

Irailaren 29an
URTEAN ZEHARREKO 26. IGANDEA

***Migratzaile eta errefuxiatuen Mundu Jardunaldia
eta Elizbarrutiko Caritasen diru-bilketa berezia***

Agurra

Jauna zuekin.

Sarrerako oharpena

Zeruan betiko biziko duguna aurreratzen dugu, Jaunaren egunean Eukaristia ospatzen dugunean: Jainkoarekin bat eginda bizitzea, alegia. Itxaropen horrek garamatza Jainkoarekin bat eginik senideen zerbitzura bizitzera, maitasunean bizitzera.

Gaur Migratzaile eta Errefuxiatuei buruzko Mundu Jardunaldia ospatzen dugu. Aurtengo Jardunaldi honi Frantzisko Aita Santuak jarri dion goiburua hau dio: “Ez da migratzaileen kontua soilik”. Denon kezka izan behar du bizimodu duin baten ametsetan bere lurraldea uzten dutenen gurutzeak eta nekeak.

Elizbarrutiko Caritasek irailan urtero egin ohi duen kanpaina eta diru-bilketa berezia ere gaur izango ditugu.

Damu-otoitza

Ospakizun hau gogotsu ospatu nahi dugu, maitasunik gabeko gure jokabide guztiak aitortuz eta Jaunaren errukia eskatuz.

—Jesus Jauna, Zu zara oker dabiltzanen bidea. Erruki, Jauna.

—Jesus Jauna, Zu zara ilunpetan dabiltzanen Egia. Kristo, erruki.

—Jesus Jauna, Zu zara ezinean dabiltzanen bizia. Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara

Otoitza

**Jainko Jauna, barkatzen eta errukitzen
agertzen duzu batez ere zeure ahalmen handia;
isur ezazu gure gainera etengabe zeure grazia,
Zuk agindutako ondasunetara lehiatuz,
zeruko zoriona iritsi dezagun.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan.**

Hitzaren liturgiari oharpena

Geure aberastasunari eta erosotasunari begira bizitzea, senideez ahaztuta bizitzea, Jainkoari bizkarra emanda bizitzea da. Entzun dezagun Bere Hitza. Ikas dezagun Jainkoari begira, senideari begietara begira bizitzen.

Lehenengo irakurgaia (Am 6, 1a. 4-7)

Amos profetaren liburutik

Honela mintzo da Jainko ahalguztiduna: «Zoritxarrekoak, beren ustea Sionen dutenak; eta Samariako mendiaz fidatzen direnak. Marfilezko zizailuetan etzaten dira, beren ohetan luze eta nag; artaldeko bildotsak eta ikuiluko zekorak jaten ari dira; zitara soinuarekin bertso kantari, David bezala, soinu berriak asmatzen; ardoa ontzi handitan edaten, eta oliorik bikainenaz beren buruak gantzutzen; ez dute Joseren hondamendiaren kezkarik. Horregatik, atzerrira eramango dituzte erbestetu guztien aurretik; honela bukatuko da mozkor-ontzien festa».

Erantzun-salmoa (*Sal* 145, 6c-7ab. 7c-8. 9-10)

Po - za - ren po - zez gaiznez - ka dau - kat nik go - go - a,
 Sal - ba - tzai - le dut Jaun - goi - ko - a.

Leiala da betiren beti,
 ematen die eskubidea zapalduei,
 ogia gose direnei. R/.

Atxilotuak Jaunak askatzen ditu,
 itsuen begiak Jaunak argitzen ditu.
 Konkor daudenak Jaunak ditu zutiarazten,
 zintzoak Jaunak ditu maitatzen. R/.

Arrotzak Jaunak ditu zaintzen,
 umezurtz eta alargunak laguntzen, '
 eta gaiztoen asmoak eragozten.
 Errege izango da Jauna sekuletan,
 zure Jainkoa, Sion, menderen mendetan. R/.

Bigarren irakurgaia (*1 Tm* 6, 11-16)

San Paulo Apostoluak Timoteori

Anaia maite: Zuk, Jaungoikoaren gizon horrek, bila ezazu zuzenbidea, erlijioa, sinesmena, maitasuna, iraupena, ezintasuna. Ekin sinesmenaren borrokari, heldu betiko bizitzari, hartarako deitua baitzaude, eta haren aitormen bikaina egin duzu, testigu askoren aurrean.

Gauza guztiak biziarazten dituen Jaungoikoaren aurrean eta Pontzio Pilatoren auzitegian aitormen bikaina egin zuen Kristo Jesusen aurrean eskatzen dizut: bete agindua kutsurik eta hizpiderik gabe, Jesu Kristo gure Jaunaren agertze egunera arte. Agertaraziko baitu Hura bere garaian, zoriontsu eta Nagusi bakar den Jainkoak, erregeen Erregea eta jaunen Jauna denak, hilezkortasuna Berak bakarrik duenak, iritsiezinezko argitan bizi denak, inork ikusi ez duenak eta ezin ikusi ere duenak. Berari aintza eta aginpidea betibetiko. Amen.

Aleluia (2 Kor 8, 9b)



Jesu Kristo aberats izanik, behartsu egin zen,
Haren behartsu izatetik zuek aberats zaitetzten. R/.

Ebanjelioa (Lk 16, 19-31)

Homiliarako argibideak (Ikus Aita Santuaren mezua)

Aberats eta pobreen arteko amildegia

Jesusek, Ebanjelioko parabolak, “izenik gabeko aberatsaren” jarrera guztiz axolagabea salatzen du, (“Jainkoa laguntzaile” esan nahi duen) “Lazaro edo Eleazar pobreen” egoeraren aurrean. Aberatsa gizadiaren zati baten sinbolo da, berari interesatzen zaiona bakarrik ikusten duen eta jende askoren sufrimendua ikusi nahi ez duen jendearen sinbolo; arindu dezake, baita ezabatu ere, neurri handi batean berak sorrarazi duen sufrimendu hori. Aberats horri izenik

jarri ez dionean, agian gutako bakoitzari esan nahi digu, begira dezagula noren alde gauden gu, zer-nolako logika darabilgun geure bizitzan.

Noren alde daude hormak edo hesiak eraikitzen dituzten horiek, milaka pertsonari gutxieneko segurtasun- eta bake-lekura iristeko eragozpenak jartzen dizkieten horiek? Heriotza eragiten die eta hilerri bihurtzen gure itsaso eta nazio-mugak; eta pobretasun, gerra eta bazterrera gelditzetik iheska dabilen jendeari jartzen dizkiete oztopoak. Zein dira oztopatzaile horiei beren axolagabekeriaz, gezurrez, aurrejuzgu eta okerreko iritziz, eta jokabide xenofobo laguntzen dietenak? Aurten Elizaren kanpainako goiburuak dioenaren harira, “Ez da migratzaileen kontua soilik”; izan ere, kontuan izan behar dira gure beldurrak, karitatea, gizatasuna, bazterrera uztea, azkeneko lekuan jatzea, pertsonaren duintasuna eta pertsona guztiena... Azken batean, mundu honetan Maitasuna den Jainkoa errege izatea da kontua.

Jesusek dioenez, diru-goseak eta axolagabekeriak egindako zuloaren alde batean dago Jainko Aita zalantzarik gabe: biziaren, errukiaren, gizatasunaren, eskubideen eta zuzentasunaren aldean; “Abrahamen altzoan”, irudi judutarraren arabera. Bestaldean daude sortzen joan diren infernua, konponduezinezko zatiketak, sufrimendu saihetsezinak. Ez du esan nahi Jainkoak alde horretan daudenenganako ardurarik ez duenik; dei egiten die eta ohartarazten hainbat profetaren bidez, gaurko lehenengo irakurgaiari Amosek egiten zuen bezala. Bere Semea bidaliko die, eta baztertuen eta bidegabekeriaz erabiliak izan direnen ondorioa emango die. Baina Seme honen piztuerak itxaropena berpiztuko dio askori. Beste zenbaitek, ordea, ez du ikusi nahiko bere etxeko ate aurrean lurrera eroria dagoen senidea, nahiz eta piztuera askoren testigu izan.

Garbi dago zein aldetan jartzen diren Jesusen jarraitzaileak. Frantzisko Aita Santuak, beraren aurreko aita santuek bezalaxe, Eliza osoaren izenean, hori aldarrikatzen jarraitzen du: *“Gizakiaren duintasuna eta guztion ongia bere abantailei uko egin nahi ez dieten batzuen lasaitasunaren gainetik dago. Balio hauek kaltetuak direnean, beharrezko da profeta-hitza”* (EG 218).

Agian, nik zer egin dezaket –esango diogu geure buruari– aberastasunaren ate ondoan lurrean etzanda eta ahaztuta geldituko diren beste Lazaro batzuk sor ez daitezten? Hasteko, hau da geure buruari egin behar diogun galdera: nire bizitza, nire pertsona, nire jokabideak, neure buruari begira al dauzkat, jarrera guztiz egoista izanez? Zabalik al dauzkat ateak, begiak, eskuak neure inguruan gertatzen denaz konturatzeko? Eta galderarekin jarraituz, ezer egiten al dut harrera ona egiteko, harremanetan jartzeko, bestelakoak direnekin elkarteko egitarau txiki batzuetan parte hartzeko, ni nagoen tokian, neure parrokan, neure auzoan...? Eta azkenik, senidetasun-sortzaile al naiz, edota urruntasuna sortzen dut? Zubiak ala hormak egiten ditut?

Jainkoari esker, asko dira Elizan eta Elizatik kanpo ere egunero lanean ari direnak, gehienetan lan isila eginez, mestizoa eta desberdina den gure mundu honetan inor bazterrera utzia gerta ez dadin. Lazaroren antzeko direnen aurrean bestaldera begiratzen ez dutenak, baizik eta zutitzen eta beste askorekin batera ibiltzen laguntzen dietenak, zartatua zegoen giza ehuna horrela konponduz. Horregatik, gaur Jainkoari eskerrak emateko eguna ere bada laguntzaile horien guztiengatik.

Jainkoaren herriaren otoitza

Senideok: egin dezagun otoitz gizaki guztien alde eta beraien beharren alde, inori falta ez dakion gure bihotz onaren laguntza:

- Elizaren alde, bere ondasunak asmo pastoral eta sozialen zerbitzuan erabil ditzala, eska diezaiogun Jaunari.
- Ekonomilariak beren plangintzak egitekoan gogoan izan dezatela beti, pertsonaren osotasunaren garapena izan behar dutela helburu, eska diezaiogun Jaunari.
- Gure gizartearen oparotasun eta leunkeriazko giroan bizi diren aberatsak kontura daitezela, badirela beren banketeetako ate ondoan horien apurren zain dauden Lazaro pobreak, eska diezaiogun Jaunari.
- Gure bihotza ez dadila gogortu, baizik eta Jainkoak munduko pobreen bidez egiten digun deia entzun dezagula, eska diezaiogun Jaunari.

Gure Jainkoa, behartsua bere izenez deitu eta aberatsa berriz ezezagun gertatzen zaizuna; entzun gure otoitzak, agertu Zure justizia zapalduerari eta emaguzu, Zure hitza entzutean sinets dezagula, hilen artetik berpiztutako Kristo Jaunak gu ere onartuko gaituela gure bizitza bukatzean Abraham gure aitaren altzoan. Errege bizi baita gizaldi eta gizaldietan.

Eukaristiaren liturgiari oharpena

Ogi-ardoekin batera, Elizbarrutiko Caritasi laguntzeko diru-bilketa ere ekarriko dugu orain aldarera. Eukaristia ospatzea eta behartsuekin eskuzabal izatea banaezinak dira..

Jaunartze-ondorengo otoitza

**Sakramentu honek, Jauna, gure gorputz-arimak berri ditzala,
Kristoren heriotza iragartzen dugunok
Haren nekaldian bezala
Haren piztueran ere parte izan dezagun.
Jesu Kristo gure Jaunaren bitartez.**